

Bosna i Hercegovina
Federacija Bosne i Hercegovine
Hercegovačko-neretvanska županija

SKUPŠTINA

Broj: 02-01-V-073/15

Mostar, 09.03.2015. godine

IZVOD IZ ZAPISNIKA **Sa pete (V) sjednice Skupštine** **Hercegovačko-neretvanske županije**

Sjednica je održana dana 09.03.2015. godine u dvorani Skupštine Hercegovačko-neretvanske županije u Mostaru sa početkom rada u 12:00 sati.

Sjednicu je otvorio Šerif Špago, predsjedavajući Skupštine Hercegovačko-neretvanske županije i pozdravio nazočne.

Tajnik Skupštine, Željka Čule obavila je prozivku.

Nazočni: Mara Anđelić, Slađan Bevanda, Boris Bošnjak, Ilija Cvitanović, Osman Ćatić, Elvira Dilberović, Mesud Džajić, Luka Faletar, Anel Kljako, Osman Macić, Andrea Martinović, Tomislav Martinović, Zijat Mušić, Ante Pavličević, Davor Peهار, Đuro Prkačin, Dario Pušić, Ivona Raguž, Zoran Raič, Vesna Saradžić, Elmir Šator, Amir Šelo, Ajman Šoše, Šerif Špago, Ana-Marija Topić-Jakovljević, Drago Tule, Adnan Velagić, Amer Zagorčić, Aner Žuljević.

Izočni: Zlatko Hadžiomerović.

Konstatirano je da je na sjednici nazočno 29 zastupnika, te da postoji kvorum za rad i punovažno odlučivanje.

Nazočni po pozivu: predstavnici Vlade, predstavnici međunarodnih organizacija i predstavnici sredstava javnog informiranja.

Predsjedavajući Skupštine je pročitao predloženi dnevni red:

1. Zastupnička pitanja,
2. Nacrt Proračuna HNŽ/K za 2015. godinu,
3. Nacrt Zakon o izvršenju Proračuna HNŽ/K za 2015. godinu,
4. Nacrt Odluke o usvajanju Prostornog plana područja posebnih obilježja „Park prirode Hutovo Blato“ za period 2013. do 2023. godine,
5. Izvještaj o realizaciji Zaključka Skupštine broj: 02-01-IV-032/15 od 06.02.2015. godine,
6. Informacija o finansijskom stanju u zdravstvenim ustanovama u HNŽ/K kojima je blokiran račun od strane Porezne uprave Federacije BiH,
7. Izvještaj o radu Županijskog/Kantonalnog tužilaštva Mostar za 2014. godinu.

Otvorena je rasprava.

Ajman Šoše, predsjednik Kluba SDA i Davor Peهار, predsjednik Kluba HDZ-a BiH su predložili da točka 2. „Proračun HNŽ/K za 2015. godinu“ i točka 3. „Zakon o izvršenju Proračuna HNŽ/K za 2015. godinu“ se razmatraju u formi nacrta a ne po skraćenom postupku.

Zijat Mušić je predložio da se u dnevni red uvrsti točka 8. „Zaključak o rješavanju radno pravnog statusa policijskih službenika.“

Na zahtjev Kluba HDZ-a uslijedila je stanka od 5 minuta radi usuglašavanja.

Nakon stanke uslijedilo je izjašnjavaње oko izmjena i dopuna dnevnog reda.

Obavljeno je glasovanje o prijedlogu da točka 2. bude Nacrt Proračuna HNŽ/K ZA 2015. godinu.

Nakon glasovanja konstatirano je da je prijedlog jednoglasno prihvaćen.

Obavljeno je glasovanje o prijedlogu da točka 3. Bude Nacrt Zakona o izvršenju Proračuna HNŽ/K za 2015. godinu.

Nakon glasovanja konstatirano je da je prijedlog jednoglasno prihvaćen.

Na prijedlog Povjerenstva za praćenje rada MUP-a, ljudska prava i građanske slobode da pod točkom 8. dnevnog reda bude: Izvješće povjerenstva za praćenje rada MUP-a, ljudska prava i građanske slobode.

Obavljeno je glasovanje o prijedlogu.

Nakon glasovanja konstatirano je da je spomenuta točka jednoglasno uvrštena u dnevni red.

Obavljeno je glasovanje o dnevnom redu sa prihvaćenim izmjenama i dopunama.

Nakon glasovanja, konstatirano je da je jednoglasno usvojen slijedeći:

Dnevni red

- 1. Zastupnička pitanja,**
- 2. Nacrt Proračuna HNŽ/K za 2015. godinu,**
- 3. Nacrt Zakona o izvršenju Proračuna HNŽ/K za 2015. godinu,**
- 4. Nacrt Odluke o usvajanju Prostornog plana područja posebnih obilježja „Park prirode Hutovo Blato“ za period 2013. do 2023. godine,**
- 5. Izvješće o realizaciji Zaključka Skupštine broj: 02-01-IV-032/15 od 06.02.2015. godine,**
- 6. Informacija o financijskom stanju u zdravstvenim ustanovama u HNŽ/K kojima je blokiran račun od strane Porezne uprave Federacije BiH,**
- 7. Izvješće o radu Županijskog/Kantonalnog tužiteljstva Mostar za 2014. godinu,**
- 8. Izvješće Povjerenstva za praćenje rada MUP-a, ljudska prava i građanske slobode.**

AD1. Zastupnička pitanja

Elvira Dilberović

Poštovani predsjedavajući, poštovana potpredsjednice, potpredsjedniče, drage kolege, poštovane kolegice zastupnice, čestitke za 8. mart, poštovani kolege zastupnici, predstavnici medija, poštovani članovi Vlade. Dakle, moja inicijativa ustvari ide u dva pravca, prvi dio mog pitanja ustvari odnosi se na inicijativu, koja je uređena članom 90 federalnog zakona o zaštiti porodice sa djecom, kojim je utvrđeno da se finansiranje ovih prava uređuje kantonalnim propisima, s tim da se propisom kantona mogu utvrditi i ostala prava porodice sa djecom. Podsjećam, da je 28.02.2014. godine Skupština HNK-a donijela zaključak kojim se Vlada HNK-a zadužuje da pokrene proceduru za izradu prijedloga zakona o zaštiti porodice sa djecom. Dakle, kao zastupnica iniciram donošenje Zakona o zaštiti porodice sa djecom u HNK-a, i u okviru naravno Okvirnog Budžeta HNK-a. U tom smislu, dakle u odnosu na član 94 Pravilnika o radu Skupštine HNK-a predlažem da Skupština donese odluku kojom bi se dakle majci porodilji omogućila finansijska podrška u iznosu od 300 KM jednokratne pomoći, a u narednih 5 mjeseci u pomoći od 100 KM mjesečno. Dakle, ne znam koliko sam bila jasna? Dakle, jedan prijedlog je ustvari donošenje odluke, koju imamo pravo kao tijelo donijeti po članu 94 Poslovnika o radu Skupštine, a drugi dio odnosi se dakle na inicijativu o donošenju zakona. I molim dakle da se ovaj zaključak od februara prošle godine objasni zašto do sada nije izrađen nikakav nacrt po pitanju ovoga zakona. Hvala lijepa.

Andrea Martinović-Pehar

Poštovani predsjedniče Skupštine, zamjenici, kolegice i kolege zastupnici, predstavnici Vlade i medija, sve vas srdačno pozdravljam. Moje pitanje upućeno je ministarstvu prosvjete, znanosti, kulture i športa HNŽ-a, a ono glasi: Koliki je ukupan broj korisnika i stipendija i ukupan broj subvencioniranja smještaja u studentske domove u ovoj akademskoj godini od strane Vlade HNŽ-a, te u kojem mjesečnom iznosu?

Također molim da mi se odgovori i popis korisnika stipendija i broj i popis korisnika subvencioniranja smještaja u studentske domove, i dostavi u pisanom obliku. Hvala.

Ajman Šoš

Pozdravljam sve prisutne ponovo. Ja imam dvije inicijative, jedna je upućena prema ministarstvu trgovine, turizma i zaštite okoline, da pokrene potupak izmjene Plana upravljanja otpadom HNK-a, odnosno da ga uskladi sa Odlukom Skupštine HNK-a o davanju saglasnosti na Prostorni plan Općine Čapljina, broj 02-01-315/13. A druga inicijativa ide prema ministarstvu obrazovanja, nauke, kulture i sporta, da ono pokrene inicijativu na Vladi HNK-a o mogućnosti kreditnog zaduženja za rekonstrukciju postojećih i izgradnju novih školskih objekata. Evo, hvala vam lijepo.

Boris Bošnjak

Poštovani predsjedavajući, zamjenici, predsjedniče Vlade, ministri, uvažene kolegice i kolege, sve vas pozdravljam. Evo, i ja se pridružujem čestitkama za jučerašnji Međunarodni Dan žena. A zastupničko pitanje upućujem prema ministarstvu obrazovanja, znanosti, kulture i športa, a to pitanje neka je ujedno pitanje i Vladi. Radi se konkretno o županijskom športskom savezu, koliko sam upućen da se o tome prošle godine dosta govorilo, da su se povukli čak i neki konkretni potezi, pa me zanama u kojoj fazi je taj projekat, jer smatram vrlo važnim pokretanja ovog Županijskog sportskog saveza, kao jedne krovne institucije športa iz kojeg bi se financirali sportaši i sportski kolektiv prema unaprijed utvrđenim pravilima i kriterijima, i naravno na osnovu rezultata. Evo neka ovo moje pitanje bude ujedno i uvod u jednu inicijativu, da zajedničkim snagama pokrenemo ovaj projekat s mrtve točke. I molim da mi se na ovo pitanje pismeno odgovori.

Sljedeće pitanje se odnosi na Vladu HNŽ-a i ministarstvo financija. Zanima me tko je odgovoran i koje su mjere poduzete zbog nepostojanja i nefunkcioniranja nadležnih komisija u ministarstvu unutrašnjih poslova, odnosno zbog čega nije imenovan policijski odbor i tko je i na temelju čega obustavio isplatu naknade za rad javno-žalbenog biroa, komisije za nadzor i agenciju za zaštitu ljudi i imovine, i neovisnog povjerenstva za odabir i reviziju, koji su zbog neplaćanja prestali funkcionirati, a čije je utemeljenje i zakonska obveza kao njihovo prvo na naknade, i čije je postojanje neophodno za pravilno i zakonito funkcioniranje MUP-a? Mislim ja ću ovdje samo kratko obrazložiti o čemu se radi, jer će kolega Mušić detaljnije vas izvijestiti jer je on predsjednik tog povjerenstva, pod točkom koju smo usvojili pod rednim brojem 8. Znači policijski odbor je drugostupanjsko tijelo u MUP-u koje je nadležno da postupa po žalbama. Radi nepostojanja ovoga tijela uskraćeno je temeljno načelo prava na žalbu u postupcima u kojima se rješavaju pitanja iz radnog prava i druga statusna pitanja uposlenika, uslijed čega nije moguće konačno i izvršno ovaj rješavanje tih pitanja. Policijski odbor je tijelo koje imenuje Vlada, a kao što nam je svima poznato od 01.07.2014. godine Vlada nije imenovala policijski odbor, što izaziva blokadu konačnog i zakonitog rješavanja statusnih pitanja uposlenika.

Javno-žalbeni biro je tijelo nadležno za rješavanje predstavki građana, čije postupanje utječe na disciplinske postupke protiv uposlenika MUP-a. U tijeku prošle godine ovo tijelo je prestalo funkcionirati,

a na navedeni natječaj nije se prijavio dovoljan broj osoba, jer je opće poznata stvar da se nisu isplaćivale dužne naknade članovima toga tijela.

Nadalje, isti problem se pojavljuje i sa komisijom za nadzor, agencijom za zaštitu ljudi i imovine. Naime, ova komisija je imenovana, ali od 4. mjeseca 2013. godine, znači uskoro će dvije godine da se ona ne plaća, pa je ista obustavila rada. Posljedica je da sada niz privatnih agencija koje u svom radu posjeduju oružje i primjenjuju druge oblike zaštite ostaju van zakonite kontrole nadležnog organa, odnosno ministarstva unutrašnjih poslova.

Sličan problem se pojavljuje ovdje i u Skupštini, gdje je Skupština imenovala nezavisni odbor za izbor i reviziju. Skupština je također donijela odluku o visini naknade članovima ovog odbora, ali za 2014. godinu ministar je obustavio isplatu ovom odboru, a ovo je tijelo nadležno za kontrolu rada ravnatelja policije.

Iskreno, ovdje mi nije baš najjasnije po kojim je kriterijima ministar financija donosio odluku koja će povjerenstva i odbore plaćati, a koje neće plaćati jer je ovdje rečeno da je to radio po svom nekom trenutnom raspoloženju, i kako to da nije poštivao odluke Skupštine? Znači on se postavlja iznad Skupštine, da kažem iznad njezinih odluka i iznad zakona, jer koliko sam upućen da jedino odluke Skupštine može poništiti Ustavni sud.

I evo na kraju, znači neplaćanje tih radnih tijela ima za posljedicu da su ista prestala funkcionirati. Evo, molit ću da mi se na ovo pitanje pismeno odgovori. Hvala lijepa.

Osman Ćatić

Poštovani predsjedavajući, zamjenici, uvaženi zastupnici, članovi Vlade. Imam poslaničko pitanje, upućeno je Ministarstvu zdravstvenog rada i socijalne politike HNK/Ž i Zavodu zdravstvenog osiguranja. Na osnovu člana 178, stav 1, Poslovnika Skupštine HNK-a, Službene novine HNK-a 20/5, postavljam Poslaničko pitanje: Koliko je i koja zdravstvena ustanova dobila kredita namijenjenih modernizaciji bolnica u kantonu od 2005. godine do 2015., mislim na korejski, saudijski, i kredit Razvojne banke? Molim vas da mi dostavite pisani odgovor. Hvala.

Također, upućujem poslaničku inicijativu Skupštini i Vladi HNK-a. Uzimajući u obzir tešku finansijsku situaciju, smatram da visine naknada za rad članova nadzornih, upravnih odbora, radnih grupa i komisija, treba ograničiti odlukom o visini naknada. Da naknade upravnim odborima, nadzornim odborima, radnim grupama i komisijama, ukoliko se plaćaju ne smiju prelaziti visinu 50% od prosječne plaće na nivou Hercegovačko-neretvanskog kantona, za vanjske saradnike, dok za zaposlenike ako rade u radnom vremenu naknada se ukida. Hvala.

Dario Pušić

Poštovani predsjedavajući, poštovani zamjenici, predstavnici Vlade i medija, uvažene kolegice i kolege, sve vas pozdravljam, te koristim priliku da damama čestitam međunarodni praznik Dan žena. Zastupničko pitanje upućujem za ministra prosvjete, znanosti, kulture i športa, gospodinu Zlatku Hadžomeroviću, a pitanje glasi: „Po kojim kriterijima se vršio odabir korisnika sredstava iz Proračuna HNŽ-a za 2014. godinu za ministarstvo prosvjete, znanosti, kulture i športa, te po kojim kriterijima ste klubove koji se ne natječu ni u jednom rangu natjecanja, na primjer klub malog nogometa „Donja mahala“ i malonogometni klub „Karaka“ Mostar pretpostavili klubovima koji se natječu u Premijer ligi i Prvoj ligi Federacije, na primjer malonogometni klub „Mostar Stari grad“ i malonogometni klub „Vjekoslav Arapović“ Mostar? Molim vas da mi na ovo pitanje odgovorite u pisnoj formi. Hvala.

Anel Kljako

Poštovani predsjedniče, zamjenici, uvažene kolege i kolegice, predstavnici medija i članovi Vlade, iskoristit ću priliku da vas pozdravim, i iskoristit ću također priliku da pripadnicima ljepšeg spola čestitam njihov praznik. Ja imam dva pitanja. Molim sva ministarstva HNK-a da mi dostave spisak svih uposlenika

po ugovoru o djelu u periodu od 2011. do 2014. godine. I također molim sve ministre da mi dostave za svaku godinu koliko je ministarstvo isplatilo novca po navedenim ugovorima o djelu. Hvala.

Aner Žuljević

Pozdravljam rukovodstvo. I pridružujem se čestitkama. Moje poslaničko pitanje je prema ministarstvu unutrašnjih poslova. Tražim da mi se dostave sve komisije u okviru ministarstva, zakonski osnov za formiranje tih komisija, te koliko su održali sjednica u 2013. i 2014. godini, te iznosi koji se plaćaju tim komisijama, i odluke po kojim su se utvrdili ti iznosi za plaćanje navedenih komisija. Zahvaljujem.

Ilija Cvitanović

Srdačan pozdrav svima. Dakle, ja bih zamolio, evo i tražio odgovor, za sve one korisnike Proračuna u protekloj godini koji su sredstva dobili grantom da se dostavi izvješće u Skupštinu o načinu i kriterijima za utrošak tih sredstava koja su dobili grantom. Hvala.

Vesna Saradžić

Zahvaljujem predsjedavajući. Pozdravljam sve prisutne. Ja imam dva poslanička pitanja i jednu inicijativu. Prvo poslaničko pitanje odnosi se na osobe sa psihičkim smetnjama koje ispred centara za socijalni rad traže smještaj u adekvatnim ustanovama. Ti zahtjevi danas već prevazilaze trenutne raspoložive mogućnosti kantona, problem je evidentan, postaje sve složeniji, a posebno zbog procedure koja dugo traje. Trenutno u Opštini Konjic imamo 10 osoba sa psihičkim smetnjama koje čekaju adekvatno zbrinjavanje, koje u prosjeku traje nekih 5 do 6 mjeseci. S obzirom na prirodu bolesti i nepredvidivost koja je neodvojiva od ove bolesti upućujem pitanje resornom ministarstvu šta se konkretno poduzima na rješavanju, odnosno prevazilaženju ove problematike?

Drugo pitanje upućujem ministarstvu obrazovanja, a ono glasi: kako je moguće da školski odbori u školama tzv. gradskih zona ne odražavaju sastav stanovništva. Zakon je tu jako decidan, ako je direktor iz jedne škole onda predsjednik školskog odbora treba da bude iz reda, pardon iz jednog naroda, a predsjednik školskog odbora treba da bude iz reda drugog naroda. Ne samo da nije predsjednik iz reda drugog naroda, već niti jedan član, a pri tome imamo ovaj članove koji su istovremeno u sastavu više školskih odbora u jednoj opštini. Ili još preciznije, kako je moguće da iz jedne kuće, odnosno jednog domaćinstva bude više članova školskog odbora u jednoj školi!?

I na kraju imam jednu inicijativu koja je vezana za rad radnih tijela ove Skupštine. Mi smo na prošloj sjednici formirali radna tijela i s obzirom na neko dosadašnje iskustvo i iskustvo iz prethodnog mandata, predlažem da na svakoj narednoj sjednici na klupe dobijemo izvještaj radnih tijela vezano za dnevni red. Mišljenja sam da bismo time zaista doprinijeli ovaj puno boljem radu Skupštine, i na kraju ono što mi je i cilj, uozbiljili rad ovih radnih tijela. Hvala.

Amer Zagorčić

Poštovani predsjedniče, rukovodstvo. Pridružujem se čestitkama koje su iskazali moji prethodnici. Imam pitanje za ministarstvo turizma. Kome i na koji način je odgovorna Turistička zajednica HNK-a i dali možemo dobiti izvještaj i finansijski izvještaj Turističke zajednice HNK-a? Dakle, izvještaj o radu i finansijski izvještaj te institucije. Hvala.

Amir Šelo

Poštovani predsjedavajući, zamjenici predsjedavajućeg, poštovane kolege zastupnice, kolege zastupnici, predstavnici medija, predstavnici Vlade. Pridružio bi se čestitkama povodom Međunarodnog praznika Dana žena. Ovom prilikom čestitao bi i pojedinim zastupnicima koji su u proteklom periodu dobili dijete, gospodin Čatić, gospodin Šoš, i gospodin Kljako, čestitke ipak. Ja imam jednu poslaničku inicijativu prema Ministarstvu turizma i zaštite okoliša HNK-a, a vezano je znači da Ministarstvu turizma i zaštite

okoliša HNK-a preduzme sve korake u zaštiti lokalnog stanovništva u naselju Opine. Radi se dakle o rejonu stanice istovara boksita. Znači lokalno stanovništvo je veoma ugroženo, prašina koja dolazi s tog područja ugrožava njihove kuće, ugrožava zdravlje lokalnog stanovništva. Znam da je dosta tih nekih stvari u nadležnosti federalnog ministarstva, međutim, evo ja bi molio naše kantonalno ministarstvo da pomogne znači tim ljudima, koji su, evo čujem i formirali udruženje, ali evo znači tražim da ministarstvo preduzme sve korake, i prema federalnom ministarstvu, da malo više koordinira navedeno pitanje. Hvala puno.

Zijat Mušić

Zahvaljujem predsjedavajući. Evo jedna inicijativa rukovodstvu Skupštine. Pošto danas je otprilike postavljeno 20-ak pitanja, a ja sam čovjek iz prethodnog saziva i otprilike sam na 50% pitanja dobio odgovor, pa bi dobro bilo da inicijativa ide prema rukovodstvu Skupštine, da se evidentiraju sva postavljena pitanja i da se u poslovničkom roku prvo izvijesti Skupštinu dali su dobili poslanici odgovor na poslanička pitanja, kako bi se moglo, jer tamo kaže ako se u određenom roku ne dobije odgovor na poslanička pitanja onda to pitanje može biti tačka dnevnog reda. Jer bit će bezveze trošiti vrijeme ako ne budemo dobijali poslanička pitanja. I mislim da je ova inicijativa dobra za rukovodstvo Skupštine, jer znam da to da su to ljudi koji su odgovorni i da će uraditi ovo. Hvala.

AD2. Nacrt Proračuna HNŽ/K za 2015. godinu

U ime predlagatelja obrazloženje je dao predsjednik Vlade Denis Lasić.

Otvorena je rasprava.

U raspravi su sudjelovali: Davor Pehar, Anel Kljako, Ajman Šoše, Adnan Velagić, Đuro Prkačin, Dario Pušić, Luka Faletar, Ilija Cvitanović, Boris Bošnjak, Aner Žuljević, Andrea Pehar, Amer Zagorčić, Zijat Mušić, Amir Šelo, Osman Macić, Osman Čatić, Tomislav Martinović, Slađan Bevanda, Elvira Dilberović, Šerif Špago.

Nakon iscrpne rasprave obavljeno je glasovanje o zaključku koji glasi: „Prihvaća se Nacrt Proračuna Hercegovačko-neretvanske županije-kantona za 2015. godinu kao osnova za izradu Prijedloga Proračuna.

Primjedbe i prijedlozi izneseni na sjednici Skupštine dostavit će se Vladi na razmatranje. Prijedlog Proračuna HNŽ/K treba dostaviti u skupštinsku proceduru najkasnije do 22.03.2015. godine.

Nakon glasovanja konstatirano je da je zaključak jednoglasno prihvaćen.

Usljedila je stanka od 30 minuta.

AD3. Nacrt Zakona o izvršenju Proračuna HNŽ/K za 2015. Godinu

Otvorena je rasprava.

U Raspravi su sudjelovali: Davor Pehar, Amir Šelo, Adnan Velagić, Zijat Mušić, Anel Kljako, Šerif Špago.

Obavljeno je glasovanje o zaključku koji glasi: „Prihvaća se Nacrt Zakona o izvršenju Proračuna HNŽ/K za 2015. godinu kao dobra osnova za izradu Prijedloga.

Primjedbe i prijedlozi izneseni na sjednici Skupštine dostavit će se Vladi na razmatranje.

Nakon glasovanja konstatirano je da je Zaključak jednoglasno prihvaćen.

AD4. Nacrt Odluke o usvajanju Prostornog plana područja posebnih obilježja „Park prirode Hutovo Blato“ za period 2013. Do 2023 godine;

U ime predlagatelja obrazloženje je dao predstavnik resornog ministarstva Jaroslav Vego.

Otvorena je rasprava.

Primjedbi i prijedloga nije bilo.

Obavljeno je glasovanje o Zaključku koji glasi: „Prihvata se Nacrt Prostornog plana područja posebnih obilježja za područje od značaja za HNŽ/K „Park prirode Hutovo Blato“ za period 2013. do 2023. godine, kao dobra osnova za izradu prijedloga Prostornog plana područja posebnih obilježja „Park prirode Hutovo Blato“ za period 2013. do 2023. godine.

Ministarstvo graditeljstva i prostornog uređenja će organizirati i provesti javnu raspravu o nacrtu Prostornog plana iz prethodne točke u roku od 60 dana.

Zaključak stupa na snagu danom donošenja, a objavit će se u „Narodnim novinama Hercegovačko-neretvanske Županije-kantona“.

Nakon glasovanja konstatirano je da je Zaključak jednoglasno usvojen.

AD5. Izvještaj o realizaciji Zaključka Skupštine broj: 02-01-IV-032/15 od 06.02.2015. godine

Predsjedavajući Skupštine Šerif Špago izvijestio je zastupnike da je izvješće dostavljeno u materijalima, te je na zamolbu predsjednika Vlade, a vezano na zaključak Skupštine pročitao zaključak koji je donijela Vlada na svojoj sjednici i koji glasi: „Vlada HNŽ/K poništava sve natječaje za prijem u radni odnos državnih službenika i namještenika u županijskim-kantonalnim ministarstvima i drugim tijelima županijske-kantonalne uprave koji su nakon donošenja zaključka Skupštine, od 7.4.2014. godine,(„Narodne novine HNŽ/K“, broj 4/14), vršeni bez Odluke Vlade o davanju suglasnosti za prijem u radni odnos državnih službenika i namještenika. Strogo se zabranjuje svim rukovoditeljima županijskih-kantonalnih tijela državne službe raspisivanje natječaja za prijem u radni odnos državnih službenika i namještenika bez suglasnosti Vlade HNŽ/K“.

Otvorena je rasprava.

U raspravi su sudjelovali: Amir Šelo, Ajman Šoše, Slađan Bevanda i Šerif Špago.

Obavljeno je glasovanje.

Nakon glasovanja konstatirano je da je većinom glasova uz 9 suzdržanih glasova usvojen slijedeći zaključak: **„Obustavlja se prijem u radni odnos državnih službenika i namještenika po završenim natječajima i natječajima koji su u toku u županijskim-kantonalnim ministarstvima i drugim tijelima županijske-kantonalne uprave, a vezano za zaključak Vlade broj: 01-1-02-338/15 od 6.3.2015. godine“.**

AD6. Informacija o finansijskom stanju u zdravstvenim ustanovama u HNŽ/K kojima je blokiran račun od strane Porezne uprave Federacije BiH

Predsjedavajući Skupštine je izvijestio zastupnike da je Informacija dostavljena u materijalima.

Otvorena je rasprava.

U raspravi su sudjelovali: Elmir Šator, Mara Anđelić, Tomislav Martinović, Ilija Cvitanović, Osman Čatić, Ante Pavličević, Aner Žuljević, Luka Faletar i Davor Pehar.

Nakon rasprave, predsjedavajući Šerif Špago je obavijestio zastupnike da će, u skladu sa raspravama zastupnika, definirati analizu o stanju zdravstva u HNŽ/K kao tematsku sjednicu koja će se održati u drugom kvartalu tekuće godine.

AD7. Izvješće o radu županijskog-kantonalnog tužiteljstva Mostar za 2014. godinu

Predsjedavajući Skupštine Šerif Špago izvijestio je zastupnike da je Izvješće dostavljeno u materijalima, te je pojasnio da Skupština ne usvaja Izvješće nego ga prima na znanje.

Glavni županijski tužitelj Mladen Jurišić podnio je Izvješće radu županijskog-kantonalnog tužiteljstva Mostar za 2014. Godinu.

Otvorena je rasprava.

U raspravi su sudjelovali: Aner Žuljević, Ajman Šoše, Boris Bošnjak i Mladen Jurišić.

AD8. Izvješće Povjerenstva za praćenje rada MUP-a, ljudska prava i građanske slobode

Zijat Mušić, predsjedavajući Povjerenstva za praćenje rada MUP-a, ljudska prava i građanske slobode, izvijestio je nazočne da su na sjednici Povjerenstva, između ostalog, upućene žalbe od strane 5 policijskih službenika koji su rješenjem od 31.10.2013. godine upućeni u mirovinu te da do danas nisu riješili svoj status, jer ne postoji policijski odbor kao tijelo koje je nadležno za rješavanje po žalbama uposlenika policije. Predložio je da Skupština donese slijedeći Zaključak: Obvezuje se Vlada HNŽ/K da u što kraćem roku riješi problem radno-pravnog statusa petorice policijskih službenika MUP-a HNŽ/K.

Otvorena je rasprava.

U raspravi su sudjelovali: Slađan Bevanda, Ilija Cvitanović, Ajman Šoše, Zijat Mušić, Tomislav Martinović, Aner Žuljević, Osman Ćatić.

Obavljeno je glasovanje o predloženom zaključku.

Nakon glasovanja konstatirano je da je jednoglasno usvojen slijedeći zaključak: **Obvezuje se Vlada HNŽ/K da u što kraćem roku riješi problem radno-pravnog statusa petorice policijskih službenika MUP-a HNŽ/K.**

Sjednica je zaključena u 18:30 sati.

Zapisničari:

Omar Robović

Dario Topić

Predsjedavajući

Šerif Špago